

THE JOURNALISM FOR DEVELOPMENT

2010-2011

ХӨГЖЛИЙН ТӨЛӨӨ СЭТГҮҮЛ ЗҮЙ

ТОМИЛОЛТ

Study trips

Дэлхийн сэтгүүл зүйн нэр хүндтэй байгууллага,
редакцуудтай танилцах, мэдээлэл бэлтгэх
технологи, техникийн дэвшилтэй танилцах,
сургах ажлууд цувралаар үргэлжилнэ.





Зургийг Б.Цогмонбаяр



ӨРНӨ, ДОРНЫГ УУЛЗУУЛАХ САНХҮҮГИЙН ТАЛБАР

Б.Цацрал, The Mongolian Mining Journal, “Хөгжлийн төлөө сэтгүүл зүй” ТББ

“Хонконг амьдрахад үнэтэй газар” хэмээн ноён Лоренс Фок бидэнд танилцуулав. “Гэхдээ бирж дээр хувьцаагаа арилжихыг хүссэн хүнд бол хямдхан шүү” гэж дараа нь бас сануулав. Энэ эрхэм Хонконгийн Хөрөнгийн биржийн Маркетинг хариуцсан захирал. Түүний хэлснээр дэлхийн хэмжээний бусад биржтэй харьцуулбал эдний зах зээлд хувьцаа гаргах үйл явц хамаагүй өртөг багатай аж. Өөрөөр хэлбэл Хонконгийн Хөрөнгийн биржид бүртгүүлж анхны хувьцаагаа арилжих хүртэлх бэлтгэл ажилд компаниуд харьцангуй бага мөнгө зарцуулдаг гэсэн үг. Энэ бол давуу тал.

Хятадад гурван арав, Монголд харин балжинням, дашням давхцан хуримын хөлд дарагдаж, найранд халамцаж хоносон хүмүүсийн хүргэн бэрийн тухай хууч шинэхнээрээ байх аравдугаар сарын 11-ний үдэд Монголын сэтгүүлчдийн баг Хонконгийн хөрөнгийн биржээр зочлон шилэн хаалтны цаанаас арилжаа хэрхэн явж байгааг сонирхож зогслоо. Аврах албаны ажилтнуудынх шиг час улаан хантааз өмссөн брокерууд тус тусынхаа дэлгэцийг ширтэн завгүй суух чив чимээгүй танхимд өдөр тутам тэрбумаар хэмжигдэх мөнгөн урсгал урсаж буй. Ноён Фокийн мэдээлснээр тэр урсгалын мөнгөн дүн дунджаар **7.9 тэрбум**




2010.10.11.Хонконг

ам.доллар. Хонконгийн биржийн нэг өдрийн арилжааны эргэлт. Энэ үзүүлэлт **Лондонгийн бирж дээр 8.0, Торонтод 5.1 байгаа** гэнэ. “Энэ хүмүүст өдрийн хоол идэх завсарлагааны цаг байдаг уу?” хэмээн хэн нэгэн нь биржийн хэвлэл мэдээллийн ажилтан Мария Лоу хатагтайгаас хэрэгт дурлан шивнэсхийн асууж байх мөчид нам гүмийг эвдэн хонх дуугарлаа. 16 цагтай уралдан чимээгүй орчныг сэрээдэг энэ хонх өдрийн арилжаа дууссаныг зарлана. Брокеруудын өмнөх факсын аппарат шиг жижигхэн төхөөрөмжүүд зүрхний бичлэг хийх мэт өдрийн арилжааны дүнгээ нэгтгэн зайгүй ажиллаж эхлэв. Яг хоёр өдрийн дараа хонх дуугарахад энэ аппаратууд сайн муу мэдээний алийг нь бидэнд дуулгах бол гэж өөрийн эрхгүй бодогдов. Тэр өдөр Монголын үндэсний компани анх удаа Хонконгийн бирж дээр хувьцаагаа зарж эхэлнэ.

Санхүүгийн мэргэжилтнүүд өнөөдөр Хонконгийн биржийг өрнө дорнын уулзах цэг хэмээн томъёолж байна. “Нэг улс, хоёр систем” бодлого энэ чухал орон зайг эзлэхэд шийдвэрлэх үүрэг гүйцэтгэснийг биржийн танилцуулгад дурджээ. Өрнө дорнын өөр өөр соёлтой хүмүүс энд санхүүгийн хэлээр ярилцаж, хамтран түншилж, харилцан ойлголцож, тасралтгүй урсах их хөрөнгийн урсгалыг түүчээлж байна.

Монголын сэтгүүлчдэд өгсөн эхний мэдээллээрээ Лоренс Фок арлын жижигхэн хот-улсын биржийг эдийн засгийн эрх чөлөөгөөрөө дэлхийд тэргүүлдэг гэлээ. Хөрөнгө санхүүгийн урсгалд ямар нэг хориг, шалгуур тавьдаггүй нь өөр нэг онцлог нь. Гадаадын иргэд, компаниуд эндхийн хөрөнгө оруулагчдын 62-оос доош хувийг эзэлж байсан тохиолдол сүүлийн арван жилийн түүхэнд нь лав байхгүй. Тэрхүү гадны хөрөнгө оруулагчдын 40 шахам хувийг америкчууд эзэлнэ. Тэдний араас англичууд жагсана.





Өнгөрсөн зургадугаар сард Хонконгийн бирж уул уурхайн компаниудыг бүртгэх шалгуураа хамаагүй зөөллөн өөрчилсөн ч зөвхөн олборлолт дагнан хийдэг компанийн хувьд хаалттай хэвээр үлджээ. Магадгүй үүнээс нь болоод Торонтогийн бирж арлын орны “анд”-аа өрсөлдөгч хэмээн үздэггүй гэж мэргэжилтнүүд таамаглаж байна. Гэлээ ч Хонконгийн ирээдүй том. “CIBC World Markets” группын дэд ерөнхийлөгч Уоррен Жилманы хэлснээр Хонконг дэлхийн уул уурхайн санхүүгийн гол цөм болох бүрэн боломж, басхүү чадавхтай. Тэрбээр энэ дүгнэлтийг Хонконгийн “Конрад” зочид буудалд болсон Уул уурхайн хөрөнгө оруулалтын чуулганы аравдугаар сарын 13-ны өдрийн хуралдаан дээр хэлсэн юм.

Харин түүний дараагийн илтгэгч, бидний танил ноён Фок Монголын уул уурхайн корпораци Хонконгийн бирж дээр хувьцаагаа арилжиж эхэлсэн тухай мэдээгээр илтгэлээ эхлэв. Энэ жил уул уурхайн ердөө тавхан гадаадын компани Хонконгийн биржид шинээр бүртгүүлжээ. Тэдэн дундаас хамгийн амжилттай цойлох магадлалтай гэж мэргэжилтнүүдийн онцолж буй нь манай үндэсний компани. Үлдсэн дөрвийнх нь үнэ уруудаж, эргээд сэргэснээ дахин буурч, эсвэл арилжаагаа хойшлуулах зэргээр биржийн худалдааны таагүй түүхийг дор дороо бичиж байгааг эх сурвалжууд мэдээлсээр байгаа.





Уул уурхайн компаниудын арилжааны өдрийн дундаж эргэлт энд 674 сая ам.доллар.

Монголын компанийн арилжаа эхэлснийг дэлхийд алдартай Mining Journal сэтгүүлийн эрхлэгч Крис Хинд Хятадын аварга зах зээлийг Монголын арвин баялагтай холбон бат бөх гагналаа хэмээн дүгнэн бичжээ. Олон хүн Хонконгийн биржийг хөгжлийнхөө түүхийг ид бичиж эхэлж байна гэдэгтэй санал нийлж байгаа. Харин Крис Хинд Хонконгийн бирж, түүнтэй тун амжилттайгаар түншилж эхэлсэн Монгол Улс хоёрыг ирэх цөөн жилийн эргэлтэд эрийн цээнд хүрч, хөгжлийнхөө өндрийг авна гэдэгт итгэж буйгаа илэрхийлжээ. ■

2010.10.11



BLOOMBERG

Л.Болормаа, Хөгжлийн төлөө сэтгүүл зүй, The Mongolian Mining Journal



2011.04.08. Сингапур

Хаслинда эфирт гарахаар бэлтгэж байлаа. 13.05 цагт түүний нэрийг хөтөлбөрт “зоожээ”. Блүүмбергийн Сингапур дахь салбараас өдөр тутам шуурхай мэдээлэл дамжуулдаг Хаслинда Аминыг дэлхийн сая сая үзэгч сайн мэднэ. Харин энэ өдөр цацах шинэ мэдээллийнх нь талаар хэн ч урьдчилан хэлж чадахгүй. Учир нь Блүүмбергийн мэдээлэл 20 секунд тутам шинэ үйл явдлаар баяжиж байна. Өдөртөө 50 мянган мэдээ энэхүү санд нэмэгдэн орох жишээтэй.

“Angkor” гэсэн бичигтэй жижиг өрөөндөө Хаслинда ороод даруухан толины өмнө хэсэг саатна. Блүүмбергийн мэдээний хэсэг туйлын энгийн бүтэцтэй. Сингапурын салбар нь бол бүр хялбар шийдлээр мэдээллээ цацдаг.

Телевизийн хэсэгт нь “үндсэн ажилтан” ердөө гурав бий гэвэл үзэгч Та гайхах нь лавтай. Дэлхийн санхүүгийн нэг томоохон төв болох Сингапураас 24 цагийн шинэ мэдээллийг дамжуулах шийдлийг шилдэг техник ба агуулгын хязгааргүй боломжоор дамжуулан зохион байгуулжээ. Эфирын хэсэгт зураглаач үгүй. Жижигхэн энэ студиас дэлхийг татсан гайхамшигт мэдээллүүд цацагддаг. Зураглаачид студийн гурван камер. Студид хөтлөгчөөс гадна зочин оролцох зай талбай бий. Нэг буланд нь жижиг дэлгэцнээс зах зээлийн өөрчлөлтийг тайлбарлах хөтлөгчийн ширээ, сандлыг байрлуулсан харагдана.



Зураглаач М.Энх-Амгалан



Сэтгүүлчийн ард Блүүмбергийн том танхим тэр чигтээ үзэгдэнэ. Зүгээр л жижигхэн студийн шилэн хана байгаа нь тэр ээ. Гурван камер дүрсээ татаж, харин түүний эвлүүлэг найруулгыг Блүүмбергийн Лондон дахь төвд шууд хийж байна. Европ, Азийн мэдээллийг хариуцдаг Блүүмбергийн Лондон дахь төвд ч ялгаагүй телевизийн техникийн хэсэг нь нүсэр биш. Ердөө гурван монтажчин найруулагч ажилладаг гэж бидэнд тайлбарлалаа. Тэгэхээр Блүүмберг хэмээх дэлхийн санхүү, зах зээлийн мэдээллийн халууны шилийг атгагч мангасын үндсэн ажлыг шинжээчид гүйцэтгэж байна. Зөвхөн Сингапурын салбарт нь 400 хүн ажилладаг ба эдний 25-26 нь сэтгүүлч, ахлах редакторууд, Үлдэх хэсэг нь зах зээлийн судлаачид, санхүүгийн мэргэжлийн хүмүүс. Тэд өмнөх дэлгэцнээсээ хараа үл салган ажиллана. Хоёр, зарим нь өмнөө 4 дэлгэц “сунгаад” тавьчихсан жирэлзэн урсах тоо цифрүүдийн учрыг олон, хандлагыг илэрхийлэн, өөр зуураа вэбкамераар ярилцах аж. Блүүмбергийн мэдээллийн санд нийт 15 сая нийтлэл, өгүүлэл, сурвалжлага мэдээ хадгалагддаг.

Биднийг үдийн 12 цагтай уралдан Блүүмбергийн Сингапур дахь төвд очих үед дэлхийн уул уурхайн салбарт шинэ шуугиан дэгдсэн байлаа. Дөрөвдүгээр сарын 4-ний өдрийн 11.51 цагт Блүүмбергийн Азийн салбар ээлжит сенсаацыг цацсан юм. Хятад уул уурхайн салбарт рекорд эвдэх шинэ наймаа хийснийг удахгүй Хаслинда тодруулан зарлах гэж байна. Зэсийн үнэ энэ оны турш “сансрын” өндөр ханшид дүүлжлэгдсээр байгаа, ийм цаг үед Хятад улс нь стратегийн түүхий эдээ Африкаас арай хямд олж авах алсын хараатай ажилласаар байгаа юм. Тэд Африкийн Замби улсын удирдагчидтай сүүлийн хэдэн жил зүгээр нэг дотносоод, үе үе айлчилсан бус, уул уурхайн томоохон түнш болох алхмаа хийжээ. Хятадын төрийн мэдлийн Minmetals Resources компани Африк тив

дэх зэсийн том уурхайн хяналтын багцыг Австралийн Equinox компаниас худалдан авснаа зарлажээ. Энэхүү арилжааны дүн 6.5 тэрбум америк доллар болсон ба Хонконг, Сидней, Торонтогийн биржүүд дээр дөрөвдүгээр сарын 4-ний өдөр дээрх компанийн хувьцаа өндөр өсөлттэй байлаа. Equinox-ийн хувьцаа өчигдөр Сиднейн бирж дээр 28 хувийн өсөлттэй гарсан бол Хонконгийн бирж дээр өчигдөр 11.25 цаг гэхэд 0.5 хувиар өсч, зах зээлийн үнэлгээ нь 2.5 тэрбум америк долларт хүрсэн байна.

Дэлхийн уул уурхайн салбарт сүүлийн жилүүдэд гарч буй өөрчлөлт бол компаниуд шинэ ордын лиценз худалдан авах, дэд бүтэц шинээр байгуулах зардал гаргахаас татгалзаж буй явдал юм. Түүхий эдийн нөөц дэлхий дахинаа хомсдох тусам компаниуд цаг хугацаа их шаардсан ордуудаас татгалзан, үйл ажиллагаа явуулж байгаа уурхайг өндөр үнээр худалдан авах жишгийг сонирхох болжээ. Ялангуяа Хятад улс нь ийм чиглэлээр туйлын бодлоготой хөдөлж, уул уурхайн бүхий л ашигтай төслүүдийг мөнгөөр зодож авсаар байна. Хятадын компаниуд зөвхөн өнгөрсөн жил гэхэд 30 тэрбум долларыг уул уурхай ба газрын тосны төсөл худалдан авахад зориулжээ. Энэ оны нэгдүгээр сард мөнөөх Minmetals компанийн Гүйцэтгэх захирал “Бид одоо зэс, цинкийн уурхайнуудад анхаарал хандуулж эхэлсэн” хэмээн мэдэгдсэн. Хятадын эрэлт металлын зах зээлийн ханшийг тодорхойлж буй үед тус улсын төрийн мэдлийн аварга компаниуд итгэмээргүй өндөр үнээр уурхайнуудыг ийнхүү худалдан авах супер арилжаа хийсээр байна.

Өчигдрийн наймааны талаар Блүүмбергийн шинжээчид “Түүхий эдийн нөөц ховордон, шинээр нээгдэх ордуудын агуулга ядмаг болсон энэ цагт Хятадын бодлого сонирхол татаж байна” хэмээн тэмдэглэжээ.



Сингапурт дөрөвдүгээр сарын 4-8 өдрүүдэд зохион байгуулагдаж буй Asia Mining Congress-ийн үеэр ч асуудлыг хөндөн ярилцах ба өчигдөр Африк дахь уул уурхайн шинэ төслүүдийн танилцуулга болж өнгөрсөн нь уул уурхайн салбар дахь үйл явдал, хандлагын сонирхолтой огтлолцол гэлтэй. Asia Mining Congress-ийн өнөөдрийн хуралдаан төмрийн хүдрийн олборлолт, эрэлт нийлүүлэлт, шинэ төслүүд, үйлдвэрлэлийн сэдвээр өрнөх бол лхагва, пүрэв гаригийн хуралданууд дээр зэсийн ирээдүй, нүүрсний тээвэрлэлт зэрэг сонирхолтой сэдвээр уул уурхайн дэлхийн тэргүүлэгч компанийн Захирлууд танилцуулга илтгэл тавьж, хэлэлцүүлэг өрнөнө. Азийн уул уурхайн салбарын энэхүү томоохон хурлын сүүлийн өдөр Монголд хөрөнгө оруулах нь сэдвээр ярилцах юм.

Тухайлбал Блүүмбергийн Сингапур салбарын студийн Asia Mining Congress-ийн төлөөлөгчид ярьсан бол өнөөдөр Хонконгийн салбарын сэтгүүлч-хөтлөгч Сюзан Лее уг хурлын тухай мэдээллийг цацахаар төлөвлөгдсөн аж. Эдний Хонконгийн салбарын телевизийн хэсэг 40 хүнтэй. Ер нь Азийн санхүүгийн төв Сингапураас Хонконг руу шилжсээр байгаа хөдөлгөөн идэвхжжээ. Блүүмбергийн 24 цагийн хөтөлбөрийг дэлхийн есөн том хот дахь салбарууд нь бие даан хийдэг ба Европ, Азийн хөтөлбөрийг Лондонгоос шууд удирдаж, зохион байгуулдаг.

Блүүмбергийн өдөр тутмын хөтөлбөрийн хуудас өнгө өнгөөр ялгасан тэмдэглэгээтэй байх ба цаг, сегментүүдийг эхний хоёр баганад зоодог. Lives, Touch, Guest гэхчлэн нэвтрүүлгийг Та бидний үзэж дассан төрлүүдээр нь ангилж тэмдэглэдэг. News болон Lives хэсгүүдэд Хаслинда Амин ажилладаг. Блүүмбергийн мэдээний цагаар дайчин цогтой Хаслинда Сингапурын биржийн мэдээ, бусад үйл явдлыг тайлбарлахад үзэгчид түүний татах ховсонд өөрийн эрхгүй ордог биз ээ. Хонконгийн Сюзан Лее гоёмсог төрхөөрөө илүү танигддаг бол Хаслинда ямагт дайчин, зогсолтгүй урсгах түүний мэдээлэл нь зах зээлийн өөрийнх нь хэмнэлтэй нэн адил.

Хаслинда хэдийгээр завгүй, хэдхэн минутын дараа эфирт гарах байсан ч бидэнтэй зургаа татуулж, хэдэн үг сольсон билээ. Блүүмбергийн нэртэй сэтгүүлч-хөтлөгч түүнтэй Mongolian Mining Journal-ийн сэтгүүлч Б. Халиун тун удахгүй сонирхолтой ярилцлага хийн, Монголын үзэгчдэд хүргэнэ. Эдийн засгийн мэдээллийг хэрхэн мэргэжлийн түвшинд бэлтгэн, шуурхай цацаж байгаатай бид газар дээр нь танилцах зорилго өвөрлөсөн билээ.



Asia Mining Congress-оос Mongolian Mining Journal сэтгүүлийн баг дэлгэрэнгүй сурвалжлага бэлтгэн цацах ба телевизийн нэвтрүүлгээ мөн үзэгчдэдээ хүргэхээр ажиллаж байна.

Блүүмбергийн Азийн салбар уул уурхайн чуулга уулзалтын талаарх мэдээллийг өчигдрөөс эхлэн цагжээ.

Дэлхийн мэдээлэл үйлдвэрлэгчид агуулгаараа өрсөлдөж байна. Энэ бол Монголын мэдээллийн зах зээлээс ялгаатай, чанарын өрсөлдөөн юм. Майкл Блүүмберг 1981 онд мэдээллийн үйлчилгээний бизнесээ эхлүүлсэн бөгөөд эдийн засаг, бизнесийн шилдэг мэдээний сонголтыг хэрэглэгчдэдээ хүргэх түүний зорилго ийнхүү тэлсээр Блүүмбергийн мэргэжлийн сервис болтлоо хүрээгээ тэлжээ.

Өдгөө Блүүмбергийн зах зээл, санхүүгийн мэдээлэл-судалгаа-лавлагаа-архивын хязгааргүй сангийн үйлчилгээг дэлхий авч байна. Монголын банк, санхүүгийн, судалгааны байгууллагууд, ялангуяа бизнесийнхэн Блүүмбергийн терминалыг сүүлийн үед идэвхтэй ашиглах болжээ. Сард 2000 ам.доллар, жилийн 24000 долларын төлбөртэй үйлчилгээ үнэ өндөр мэт сонсогдовч зах зээлийн шинэ мэдээлэл, хандлагыг мөнгө болгон өөртөө ашиглах чадвартай хэнд ч болов хязгааргүй боломж юм.

Монголын сэтгүүлчдэд Блүүмбергийн мэдээллийг хэрхэн ойлгох, унших талаарх цуврал сургалтыг бид давхар хийж эхэлсэн билээ. Өөрсдөө гүнзгийрүүлэн суралцах шаардлага байгаагийн улмаас энд, Сингапурт хурал сурвалжлах үндсэн ажлынхаа хажуугаар Блүүмбергийн салбартай танилцан, мэргэжлийн хүмүүстэй уулзсаар явна. Манай сэтгүүлчдийн баг түүнчлэн Fox News, Dow Jones-ийн салбаруудтай танилцах төлөвлөгөөтэй.

Хаслинда бол бидний ижил сэтгүүлч. Ялгаатай нь тэрбээр өндөр мэргэшсэн шинжээч-сэтгүүлч, бас авьяаслаг хөтлөгч. Хар өнгийн хослолоор гоёсон Хаслинда хэдхэн минутын дараа эфирт гарахаар зэхэж байна. Түүний өмнө ногоон, шар, улбар шар, улаан, цагаан өнгөөр ялгасан товчлуур бүхий кееборд байна. Энэ бол Блүүмбергийн “хамаатан” бүх хүний ашигладаг кееборд. Улаан өнгөтэй нь зогсоох, болгоомжлуулсан товчлуур бол

шар нь зах зээлийн гол мэдээллийг авах үндсэн хөтлөгчид. Харин ногоон товчлуурууд Таныг хэвлэх, цэс рүү орох, туслалцаа хүсэх гэхчлэн гол үйл хөдлөлд удирддаг. Ойлгохгүй зүйл мэдээж зөндөө гарна. Тэгвэл ногоон өнгийн Help товч Танд 24 цагийн турш шуурхай үйлчилдэг. Ямар мэдээлэл хүсч байгаагаа бичлээ, илгээлээ, хэдхэн секундын дараа хариу ирнэ, цаг хугацаа шаардсан хайлт хийх хэрэгтэй бол “түр хүлээнэ үү, төдөн минутын дараа хэлээд өгье” гэх мэтээр жинхэнэ найз шиг тусална шүү дээ. Блүүмбергийн арвин сангаас хүссэнээ авч, арилжаанд мэдлэгтэй орохын тулд зайлшгүй суралцах олон зүйл бий. Хамгийн эхнийх нь таних тэмдэглэгээнүүдийг тогтоох хэрэг гарна. Бидний бичдэг шиг “ингээд, тэгээд” хэмээн шал шалхийх шаардлага санхүүгийн ертөнцөд үгүй болохоор энгийн товчлолуудыг өргөн ашигладаг. Тухайлбал, үнэ ханшийн графикуудыг дэлгэц дээр хармаар байгаа бол GP гэсэн хоёр үсгийг сонго. Шинжээчдийн дүгнэлтийг сонсъя гэвэл PEOP хэсэг рүү орно. За бүр сайн ресторанд хоол идмээр санагдвал DINE гээд хайгаарай. Blackberry утасны хэрэглэгчид BERRY хэмээх товчлуураар өөрсдийн замыг олдог.

Блүүмбергийн Сингапурын салбарын хан өдрийн хоолондоо орох цаг болжээ. Олонх нь гадагшаа гарсангүй. Ажилтнуудад зориулсан цайны хэсэгтээ тухалж, ойр зуурын хөнгөн хоол идэх аж. Capital Square-ийн 11 ба 12 дугаар давхруудад “ухаантай” мэдээллүүд ийнхүү бэлтгэгдэж байна. Хаслиндагийн эфирийн цагаар ард нь Сингапурын гудамж талбай, өндөр байшингууд Танд харагдана уу. Хаслинда Амин зүгээр л жижигхэн цонхныхоо наана суучихсан байгаа нь тэр. Жижигхэн өрөөнөөс нэвтрүүлгээ эвтэйхэн цацчихдаг. Энд их ухаантай зүйлсийг энгийн шийдлээр хийж байна. ■

2011.04.08



2014.05.10

Канад, Ванкувер



Канад байгалийн нөөцөөр баялаг орон. Туулсан туршлага, алдсан алдаа, авсан сургамж бүхнээ хуваалцахаар богино хугацааны сургалтын хөтөлбөрийг Монголын төлөөлөгчдөд тусгайлан зориулж гаргасан юм.

Канадын олборлох салбарын үйлдвэр болон хөгжлийн олон улсын хүрээлэн /CIIED/-гийн урилгаар Канадын уул уурхайн салбарын туршлагатай танилцах багт төрийн болон төрийн бус байгууллага, их сургууль, судалгааны байгууллага, хэвлэл



мэдээллийн салбарын төлөөллийн хамт The Mongolian Mining Journal сэтгүүлийн Орлогч эрхлэгч Н.Ариунтуяа багтсан юм.

2015.03.27

Улаанбаатар



“Хөгжлийн төлөө сэтгүүл зүй” төрийн бус байгууллагын үйл ажиллагаа нь Монголоос хальж, дэлхий рүү хандсан ба үүний нэг гэрч нь Канадын Бритиш Колумбын их сургуулийн Норман Б.Кийвлийн нэрэмжит Уул уурхайн сургуулийн төлөөллүүд Mongolian Mining Journal-ын редакцид зочилсон уулзалт юм. Тус Институтийн дэлхийд нэр хүндтэй профессорууд MMJ-ийн Редакцийн байнгын зочин болдог.



2017.04.17

Гүрж. Тбилиси хот



Байгалийн баялгийн нөөцтэй, улсынх нь төсөв уул уурхайн орлогоос хамааралтай, улс дамнасан томоохон корпорациуд олборлох үйл ажиллагаа явуулдаг, эдийн засгийн хувьд дундаж хөгжилтэй орнуудын эрдэс баялгийн салбарын ил тод байдлыг хангахад сэтгүүлчдийн үүрэг оролцоог нэмэгдүүлэх зорилготой сургалт Тбилиси хотноо зохиогдсон юм.



Ийм төрлийн сургалтыг улс орнуудаар бүсчлэн зохиох бөгөөд энэ удаад Төв болоод Дунд Азийн бүс нутгийн Монгол, Киргиз, Азербайжан, Узбекистан, Украин, Гүрж улсын сэтгүүлчдийг хамруулсан ба Монголоос The Mongolian Mining Journal-ын Э.Оджаргал оролцоод ирлээ.



2017.04.22

Австрали



Эдийн засаг, уул уурхайн сэтгүүлчдийг чадавхжуулах, мэргэшүүлэх зорилготой Германы олон улсын хамтын ажиллагааны нийгэмлэг (GIZ)-ийн Эрдэс баялаг, түүхий эдийн иж бүрэн санаачилга төслийн хүрээнд Монголын арав гаруй сэтгүүлч Австралийн уул уурхайн хөгжил, дэвшилтэй танилцахаар Квийнсланд мужийн төв Брисбэнд хүрэлцэн очсон. Бүтэн жил үргэлжилсэн сэтгүүл зүй, уул уурхайн сэдэвт дөрвөн удаагийн онолын сургалт явуулсны сүүлийн шатны практик сургалт ийнхүү Австрали оронд эхэлсэн юм.

Дөрвөн шатны сургалтыг Квийнсландын их сургуулийн сэтгүүл зүйн профессор Брюс Вүүлэй, тус сургуулийн Эрдэс баялгийн тогтвортой хөгжлийн институтын (ЭБТХИ) дэд захирал Робин Эванснар удирдан явуулсан билээ.

2018.06.11

ХБНГУ. Бонн



Германы Олон улсын хамтын ажиллагааны нийгэмлэг (GIZ)-ийн Эрдэс баялаг, түүхий эдийн иж бүрэн санаачлага хөтөлбөр, The Mongolian Mining Journal-ийн дэргэдэх “Хөгжлийн төлөө сэтгүүл зүй” ТББ хамтран “Сэтгүүлчдийн менторшип хөтөлбөр”-ийг 2018 онд зохион байгууллаа.



“Менторшип” хөтөлбөрийн ментороор сонгогдсон сэтгүүлчид тавдугаар сард ХБНГУ-ын Бонн хотноо болсон Global Media Forum-д оролцон, Германы Дойче Вилле академи болон Хамбах болон Гразвейлерийн хүрэн нүүрсний уурхайн үйл ажиллагаатай танилцсан юм. The Mongolian Mining Journal-ийн редактор Г.Идэрхангай уг хөтөлбөрийн ментороор ажиллахдаа Дойче Виллед сэтгүүлчдээ төлөөлөн ярилцлага өглөө.

2018.09.26

Австрали. Мельбурн



Энэ удаагийн аялал уул уурхайн дижитал технологи буюу автоматжуулалт, инновацид илүүтэй чиглэснээрээ онцлог байлаа. Аяллаар сэтгүүлчид “Рио Тинто”-гийн Брисбэн хот дахь Өсөлт, инновацийн салбар болон Мельбурн хот дахь Технологи хөгжүүлэлтийн төв, Австралийн Квийнслэнд мужийн Уул уурхайн ассоциаци, Квийнслэндийн их сургуулийн харьяа Тогтвортой эрдэс баялгийн хүрээлэн (Sustainable Minerals Institute) болон голлох хэвлэл мэдээлэл болох Fairfax-ийн дэргэдэх Australian Financial Review сонины редакцийн үйл ажиллагаатай танилцлаа.

Монголын сэтгүүлчид дэлхийн шилдэг уул уурхайн орон болсон Австралийн уул уурхай, тэр дундаа “Рио Тинто” компанийн инноваци, ноу-хаутай танилцлаа.



Иймд уг ажлыг “Mongolian Mining Journal”-ийн дэргэдэх сэтгүүлчдийг чадавхжуулах зорилго бүхий “Хөгжлийн төлөө сэтгүүл зүй” ТББ нь “Оюутолгой” компани болон Германы олон улсын хамтын ажиллагааны нийгэмлэг (GIZ)-ийн Эрдэс баялаг, түүхий эдийн иж бүрэн санаачилга хөтөлбөрийн дэмжлэгтэйгээр амжилттай хамтран зохион байгуулсан юм.

2018.10.11

ОХУ, Дубна хот



60 гаруй жилийн түүхтэй Дубна дахь Цөмийн Шинжилгээний Нэгдсэн Институтын /ЦШНИ/ үйл ажиллагаатай танилцах, хүрээлэнд ажиллаж байгаа монгол мэргэжилтнүүдтэй уулзах аялалыг “Росатом” корпорацийн Зүүн Азийн бүс хариуцсан “Русатом” охин компаниас зохион байгуулсан юм. Аравдугаар сарын 11-13-ны өдрүүдэд үргэлжилсэн тус аялалд The Mongolian Mining Journal-ийн Э.Оджаргал оролцоод ирлээ.

2019.04.24

Канадын Бритиш Колумб мужийн Ванкувер хот.

Баялгийн засаглалын асуудлаарх сайн жишээ, тэргүүлэх туршлагуудыг хэлэлцсэн олон улсын семинар Канадын Бритиш Колумб мужийн Ванкувер хотноо дөрөвдүгээр сарын 24-25-нд зохион байгуулагдлаа. Канадын эрдэс баялаг, хөгжлийн олон улсын хүрээлэн (CIRDI)-ээс зохион байгуулсан энэхүү семинарт Аргентин, Эквадор, Сенегал, Швед, Монгол, Гуяна, Чили, Этиоп, Вьетнам, Колумб, Кени, Канадын Засгийн газар, төрийн бус байгууллагын төлөөлөл оролцсон юм.

Энэхүү төлөөлөгчдийн бүрэлдэхүүнд The Mongolian Mining Journal сэтгүүлийн сэтгүүлч Б.Төгсбилэгт багтсан юм.

